



ÁLVARO VILA ARAUJO, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA O REXEITAMENTO DOS NOVOS GASTOS DE XESTIÓN NA AVALIZACIÓN DE BACHARELATO PARA O ACCESO Á UNIVERSIDADE (ABAU) NO CONCELLO DA RÚA**

No marco das competencias atribuídas á Deputación Provincial de Ourense en materia de cooperación coas entidades locais e apoio aos servizos públicos esenciais, o Grupo Provincial Socialista estima preciso elevar a voz de alarma fronte á nova carga económica que se está a trasladar a certos concellos rurais en concepto de contraprestación pola organización da Avaliación de Bacharelato para o Acceso á Universidade (ABAU). Recentemente, o Concello de A Rúa formalizou a súa participación no convenio coa Comisión Interuniversitaria da Galicia (CIUG) para albergar as PAU no Instituto de Ensinanza Secundaria (IES) Cosme López. Un compromiso que, sen dúbida, beneficia ao alumnado local e aos municipios limítrofes, xa que supón un importante esforzo loxístico e económico a prol da equidade educativa.

Porén, durante o proceso de formalización deste acordo detectouse un feito nomeadamente preocupante: a inclusión dun novo concepto denominado “gastos de xestión, coordinación e materiais das probas que pola súa natureza non poden xustificarse en forma directa ao non poder individualizarse”, ascendendo o importe aos 3.645 euros. A esta suma hai que engadir 9.972 euros en concepto de “gastos da convocatoria de xuño” e 8.258 euros pola de xullo. Estas partidas non figuraban en convenios anteriores nin resulta transparente a súa necesidade ou composición exacta. Estes novos custos elevan até os 21.875 euros o total a abonar entre os concellos afectados, de maneira alícuota, representando un monto moi elevado para orzamentos de por si limitados, coa agravante de que teñen que pagarse ao remate da convocatoria de xullo ou, en todo caso, antes de outubro.

Máis grave resulta aínda a situación cando comprobamos que en toda Galicia só tres concellos —Viveiro, Cee e A Rúa— son os únicos responsables do pagamento deste custo, mentres que outros centros participantes non asumen ningunha carga directa. Doutra banda, o alumnado procedente de centros como Quiroga (Lugo), Martaguisela (O Barco), Xermán Ancochea Quevedo (Trives), Carlos Casares (Viana), Lauro Olmo (O Barco) ou o mesmo Colexio Pablo VI Fátima (A Rúa) non teñen opción de escoller sede, sendo esta designada unilateralmente pola Comisión Interuniversitaria de Galicia (CIUG), o que agrava a desigualdade entre os estudantes segundo a súa procedencia.

O Grupo Provincial Socialista quere mostrar o seu compromiso coa equidade territorial, coa educación pública de calidade e co sostemento dos pequenos concellos, que son a



Grupo Provincial Socialista

Rúa Progreso, 32 – 2º andar

32003 Ourense

Tlf. 988 317 972

CIF: G32244345

columna vertebral da nosa provincia. É tempo que as administracións superiores asuman as súas responsabilidades e deixen de trasladar custos aos entes locais, que xa teñen demasiadas cargas para garantir os dereitos básicos da cidadanía. Os socialistas entendemos que estamos fronte a unha transferencia de responsabilidades inxustificada cara os entes locais, afectando desproporcionadamente aos pequenos concellos que xa de por si soportan dificultades maiores para garantir os servizos básicos. Doutra banda, tamén denotamos unha falta de coordinación e transparencia na planificación destas probas, que non toman en consideración a realidade socioeducativa do medio rural e o esforzo adicional que supón para estes territorios acoller actividades tan determinantes como a ABAU.

Por todo o exposto o Grupo Provincial Socialista presenta as seguintes **PROPOSTAS DE ACORDO:**

PRIMEIRA.- Requirir á CIUG a retirada inmediata do concepto de “gastos de xestión” incluído nos convenios colectivos para a celebración da ABAU por consideralo inxustifico, pouco transparente e desproporcionado para os concellos rurais.

SEGUNDA.- Solicitar á Consellería de Educación, Ciencia, Universidades e Formación Profesional o establecemento de criterios claros e equitativos de distribución dos custos asociados á organización da ABAU, tomando en consideración a realidade territorial e as capacidades económicas dos concellos implicados.

TERCEIRA.- Instar á Deputación Provincial de Ourense a que actúe como mediadora entre os concellos afectados e a administración autonómica para buscar solucións conxuntas que garantan a continuidade das sedes universitarias nos concellos rurais, sen sobrecargar economicamente aos mesmos.

CUARTA.- Manifestar o apoio institucional da Deputación de Ourense ao Concello de A Rúa na súa posición contraria ao novo custo, recoñecendo o seu esforzo en favor da educación pública e accesible para toda a poboación da comarca e da provincia.

En Ourense, a 12 de maio do 2025.

Asinado: **Álvaro Vila Araújo**

SR. PRESIDENTE DA DEPUTACIÓN PROVINCIAL DE OURENSE

socialistaourense@gmail.com

[Facebook: PSdeGdeOurense](#)

[Twitter: @PSdeGDepOU](#)